

CARTA JEE NI TEE SANTIAGO NUU ÑAYUU CACANDIJE

1 Máá rí cúu Santiago, mozo Yaā Dios jíin Jítoho yō Jesucristo. Te tée ri carta yáha cuájeē nuū rohó ñáyuu cacandíje jeē cácuu ró ndihúxí uū yucūn Israel, te ni cajitē núu ró nń ñáyíví. Sándeyí ni rō jijnáhan ró.

Yaā Dios sáha jeē jécūhun ni yō

2Ñánī mánī, na cúsiī ndasí ni rō jijnáhan ró núu quiji tijnī tāca jnúndóho siquī rō. **3**Chi cájini rō jeē núu jító ndee jnúndóho rōhó núu cacandíje vāha ró, te yūcuan sáha jeē cútūhva ró cuándeyí ni rō. **4**Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

5Te núu ndé iin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicán i. **6**Te jeē jicán rō, te cánuú candíje ró jéē sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájñuhun ndute mar jeē ndóna jísó cóyo cuahān cháha chúcuan sáha tachī. **7**Ñayuu ún ma cáni ni i

jeē sáha Jítoho yō jeē jicán i. **8**Chi ñayuu jeē jéni iin jéni uū ni, chi mánī násāma ni i jíin táca jniñu cásáha i.

9Tācá hermano ndahú, na cúsiī ni de jeē sáha Yaā Dios jeē cujéhnū de. **10**Te hermano cucá, na cúsiī ni de núu ni ndundáhú de. Chi tāca tée cucá, yachī naa jeē cucá de, nájñuhun nāa ita yucū. **11**Chi núu ni cane niāndii te cújihní, te íchí-ni yucū, te cóyo-ni ita, te nāā-ni jeē lúu cáa. Te suni súcuan ndoho tāca tée cucá níní sá jícu de jíin jniñu de.

Siquí jeē jító ndee jnúndóho yóhó

12Yōhoyo ndetū tēe jeē jéndeýí ni de núu jító ndee jnúndóho de. Chi núu je ni cundeyí de jíin, te nihin de premio jeē cujéhnū de cotecu de nń cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá. **13**Núu iin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni iin ma cúu cuiti sáha jeē quívi Yaā Dios cuēchi, te ni máá yá tu squívi ya ni iin ñayuu nuū cuēchi. **14**Chi sa suhva jeē ndíyo néé ni maá i, suu sáha jeē jicán ini i sáha i cuēchi,

te scánda ini i chi stáhú un i. ¹⁵Te jeē ndíyo néé ni i, yūcuan quejéé cuéchi. Te cuēchi ún, núu je ni cunihin, te sáha jeē jnahnú ndetū ñayuu. ¹⁶Núu súcuan te ma stívi ró cani ni rō jijnáhan ró, ñánī mání.

¹⁷Tāca jéé cútahū yō jeē váha jeē lúu íyó, chi vēji nde andiví núu maá Yaā Dios, Yaā ni sáha tāca jéē ndíndēe iin andiví. Te máá yá tu násama cuiti ini yā nájñuhun násama nduva jíin cuándahū. ¹⁸Te ni sáha ya jeē cótecu yō níf cáni, chi ni candíje yó jnúhun ndaā yā. Te ni nduu yó nájñuhun sēhe nuú yá nuū tāca gá sēhe ya jeē quíji, chi súcuan ni nujnahán ni yā sáha ya.

Siquí ndese chiñúhún ndaā yō yā

¹⁹Núu súcuan te tāca róhó ñánī mání, ñama na chúsóhó ró jñuhun ya, te sa suhva ma cahán yachī rō, ni ma quití yachī ni rō. ²⁰Chi ñayuu cáquití ni, tu sáha i jniñu ndaā jeē cuní Yaā Dios. ²¹Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vitá ni rō te cuatáhú ró jñuhun ya jeē ni quívi ini anuá rō. Chi jñuhun un ndíso poder jeē cācu ánuá rō.

²²Te na squícu ró jéē steén jñuhun ún, te nasūu máá jéē cúni sōho ró súcuan-ni, chi núu súcuan te cástáhú ró maá ró, chi tu níhín jniñu núu tu squícu ró. ²³Chi tēe jeē jíni sōho de jñuhun ya súcuan-ni, te tu squícu de, cúu de nájñuhun iin tēe jeē jíto de nuū espejo ndese cáa nuū de. ²⁴Te jíto vāha de nuū de, te cuahān-ni de, te nāá ni de ndese cáa nuū de. ²⁵Te núu iin tēe tu nāá ni de jñuhun jíni sōho de, chi sa suhva chúhun vāha ni de jeē cahán

maá ley ndaā Jesús jeē ni sáha libre yohó, te núu cuiñi nihin de jíin, te squícu de jeē ndácu, yūcuán na te quéndōo ndetū de jíin jniñu váha jeē sáha de.

²⁶Te núu ndé iin ró jéni ni rō jeē chiñúhún váha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjñiñu jeē chiñúhún ró yā. ²⁷Ñayuu jeē chiñúhún ndoo chíñúhún ndáa i máá Tátá yō Yaā Dios, chi jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jñundóho íyó. Te tu sájnehén i ánuá i jíin jniñu néé íyó ñáyiví.

Ma cúhichī ni yō coto yó ñayuu ndahú

2 Ñánī mání, cácandíje ró Jítoho yō Jesucristo jeē cujéhnu luu ya. Núu súcuan te ma sáha ró cuenta ndese cúu iin iin ñayuu, chi inuú sáha ró jíin ndíhi i. ²Chi íyó jínu quívi iin tēe ini vehe nuū cándutútú ró, te yíhi xehyu oro ndaha de, te ñúhun de sahma váha. Te suni íyó jínu quívi iin tēe ndáhú, te ñúhun de sahma tahndé. ³Te tú vāha núu sáha yáñúhún ró jíin tēe ñúhun sahma váha, te cahán rō jíin de: Cucōo ní lugar váha yāhá. Te cahán rō jíin tēe ndáhú: Yūcuán cuiñi ní, chí yáha cucōo ní nuū ñúhun, achi rō. ⁴Chi núu cásáha ró súcuan, te tu jéni vāha ni rō siquí jnáhan ró, chí sáin sáha ró jíin tēe cúcá jíin tēe ndáhú.

⁵Ñánī mání, chusóhó ró jñuhun cáhán rí: Yaā Dios ni nacáji ya ñayuu ndahú ini ñáyivi yáha jéé cóo cúcá i jíin jnúhun cácandíje i

ya, te nihīn i tahū i ñuu nuū ndácu ya jniñu. Chi ni jejnūhun ya cuāha ya un núu ñáyuu jeē maní jíin yá. ⁶Te máá ró chi sa suhva cájēhe ró jnúhun canu ñayuu ndahú. ¿Te á násūu tée cúcá cúu jeē castáhú róhó síquī jeē nihín de xūhun ró, te yachi jéquin de cuēchi síquī rō nuū tohó? ⁷Te suni cácahān neé de síquī Cristo, te suu síhví máá yá cúu jeē cánamí ró cristiano.

⁸Vāha cásáha ró te núu cásquīcu ndije ró máá jnúhun jéhnū ga jeē cahán ley, nájñūhun yósó núu tútu ii: Cundáhú ni rō jnáhan ró nájñūhun cundáhú ni rō maá ró, achí. ⁹Te núu síin sáha ró jíin ñáyuu cucá jíin ñáyuu ndahú, núu súcuan te cuēchi cásáha ró, te jécondee cuēchi síquī rō jeē stívi ró ley Yaā Dios. ¹⁰Chi núu iin ñayuu stívi i iin-ni jniñu ndácu ley, te vēsú na squīcu i ndihī ga, te nájñūhun ni stívi i ndihī ley, te ndihī un jécondee cuēchi síquī i. ¹¹Chi Yaā jeē ni cáhān jeē ma cósíquí ndéē jnáhan ró, suni ni cahān yā jeē ma cáhni rō ndīyī. Te vēsú tu ní cásíquí ndéē jnáhan ró, te núu ni jehni rō ndīyī, núu súcuan te je ni stívi ndihī ró ley. ¹²Te tāca jéē cahán rō jíin jéē sáha ró, chi sáha ró cuenta jeē sándaā yā ndihī un jíin máá ley Jesús jeē ni sáha libre rohó. ¹³Chi quívī sándaā yā jniñu, te ñayuu jeē tu ní cundáhú ni jnáhan, suni ma nihín i jñūhun cundáhú ni. Te ñayuu ni cundáhú ni jnáhan, cusīi ni i jeē ní ndahva yā cuēchi i máá quívī sándaā yā jniñu.

**Tu jéjníñu jeē candíje yó
núu tu squīcu yó**

¹⁴Ñānī mánī, núu cáhān iin tēe jeē candíje de jeē sáha ya jehē de,

te núu tu sáha de jniñu váha, ¿te ndé jéjníñu jeē candíje de ún? ¿A cuu cācu ánuá de jíin jéē cahán-ni de jeē candíje de, te núu tu sáha de jniñu váha? ¹⁵Te núu iin hermano yō chí hermana yō, cúmanī sahna i jíin jéē cáji i tāca quívī, ¹⁶te núu iin ró cáhān jíin i: Cuandeyí ni rō, te cusúcún váha ró te caji vāha ró, achi rō jíin i, te núu tu ní jéhe ro jéē jíni ñūhún i cotecu i, ¿te ndé jéjníñu jeē cahán rō súcuan? ¹⁷Te suni súcuan cúu jeē núu áchí ró jeē candíje ró jeē sáha ya jehē rō, te núu tu sáha ró jniñu váha, núu súcuan te tu ndé jéjníñu cuiti jeē cahán-ni ró jéē candíje ró.

¹⁸Te sanaa te cahān iin ñayuu: Róhó chi cándíje ró jéē sáha ya jehē rō, te ruhū chi sáha ri jniñu váha. ¿Na jíin stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī. ¹⁹Ndaā chi cándíje ró jeē iyó iin-ni Yaā Dios. Te va íyó váha núu súcuan. Te tachī chi suni súcuan cácandíje, te cáquisi i jeē cáyūhú, chi tu cásáha jniñu váha. ²⁰¿Te naun tu jécūhun ni rō? ¿A tu jíin rō jeē núu tu sáha ró jniñu váha, te tu ndé jéjníñu cuiti jeē cahán rō jeē candíje ró? ²¹Te jíi yō Abraham, ni ndahva yā cuēchi de síquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar. ²²Te jécūhun ni rō jeē síquī jeē ní candíje de jeē sáha ya jeē ni jéjñūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu

ni steén jeē candíje ndije de jeē sáha ya jeē ni jéjnūhun ya nuū de. ²³Te súcuan ni cundaā jnūhun cáhán tutu ii: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cáncandíje i jeē sáha ya jehē i, te nasūu máá jéē cahán-ni i jeē candíje i. ²⁵Te suni súcuan Rahab, vēsú ñahan tǎjni ni ni cuu ña xihna gā, te ni ndahva yā cuēchi ña siquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū tēe cánducú cahni de. Te jeē yúcuan ní ndahva Yaā Dios cuēchi ña.

²⁶Te iin ñayuu núu tuá anuá i nuū yiqui cúñu i, te ndíyí cúu i. Te suni súcuan núu cáncandíje yó jeē sáha ya jehē yō, te núu tu sáha yó jniñu váha, te nájnūhun ndíyí cúu yó.

Jnūhun siquī yaá yó

3 Ñání mání, ma cáni ni cuehē rō cuu ró maestro steén jnūhun ya. Chi cajini rō jeē yóhó jéē steén jnūhun, cuehē gā cuēchi ndenehen ya siquī yō. ²Chi ndíhi yó stívi cuehē jniñu. Te núu iin tēe cuu condito de yáá de jeē ma stívi de jíin ni iin jeē cahán de, núu súcuan te yōhyo váha tēe cúu de, te suni cuu condito de níí gá de jeē ma stívi de. ³Chi cúu nájnūhun jeē chíhi yó freno yuhu caballo, te súcuan snáhnú yō níí tí jeē quihín tǎ jíin yó ndé nuū cuní yō. ⁴Te suni

súcuan tāca barco, vēsú náhnu ndasí, te vēsú nihin chúndahá táchí, te jíin iin timón lulí-ni te cuu scuícó tēe scáca, te quihín de jíin ndé nuū cuní de. ⁵Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíiní yō jeē iin ñuhūn lulí cuu jniñi jeē cayú iin yucu cáhnu ndasí. ⁶Te suni súcuan yáá yó, chi sáha nájnūhun iin ñuhūn, chi scuíquín cuehē teyí jniñu néé. Te yáá yó cúu iin parte lulí yiqui cúñu yō, te sáha jeē quívi níí yó cuēchi. Te infierno cúu jeē scuíquín jnūhun néé jíin yáá yó, te yáá yó scuíquín cuehē jniñu néé níí tiempo jeē iyó yó ini ñayívi. ⁷Te ñayuu chi cuu snáhnú i tācá quití jíin saa jíin cóo jíin quití ñúhun nuū mar, te je ni snáhnú i cuehē tǎ. ⁸Te ni iin ñayuu ma cúu condito i yáá i. Chi iin jeē neé jéē ma cúu condito i cúu. Te nájnūhun yuhu cóo jeē ñúhun chítú veneno jeē jéhni, súcuan cúu yáá yó. ⁹Jíin yáá yó chiñúhún yó Tatá yō Yaā Dios, te suni jíin yáá yó cahán ndevāha yo síquī ñayuu jeē ni sáha ya ánuá i nájnūhun íyó máá yá. ¹⁰Iin-ni yuhu cáne jnūhun chíñúhún yó yá jíin jnúhun cáhán ndevāha yó. Ñání mání, tu íyó váha cuítí jeē súcuan. ¹¹¿A iin-ni tesōcó cáne ndute váha jíin ndute úvuá, chí naún? ¹²Ñání mání, ¿á cuu cuun ndehē oliva xiní yújnu higo, te á cuu cuun ndehē higo xiní yoyúcú uva, chí naún? Te suni súcuan iin tesōcó ma cúu cane ndute úhvuá jíin ndute váha.

Jnūhun ndíchí jéē véji nuū Yaā Dios

¹³Te núu ndé iin ró ndíchí te jécūhun váha ni, núu súcuan te

jiín jéé jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá. ¹⁴Te núu cácuésún teyí ni rō te ndúcú ró jéé cujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra siquī jnūhun ndaā. ¹⁵Chi ñayuu cándāa súcuan, nasūu núu Yaā Dios vēji jeē ndíchí i. Chi cuenta ñayīví, jiín cuenta anuá neé ñayuu, jiín cuenta maá jéxeén cúu. ¹⁶Chi nuū iyó ñayuu cucuésún ni jiín ñayuu nducú jéé cujéhnu máá, suni yūcuan íyó jnūhun sáca núu jiín táca jniñu neé. ¹⁷Te jnūhun ndíchí jeē vēji nuū Yaā Dios, núu ni sáha jeē ní ndundíchí ñayuu, yūcuán na te íyó ndoo ánuá i. Te suni yúcu maní i jiín jnáhan i, te vītá ni i, te tú ñihni ni i. Te cúndáhú ni i jnáhan i, te sáha i jniñu váha. Te suni íyó ndáā i, te tu stáhú i. ¹⁸Te ñayuu cáyūcu mání jiín jnáhan, jiín jnūhun maní casáha i tācá jniñu ndaā, te nanihñ i jeē quéndōo ndaā i.

Jeē ma cutóó ni yō jeē iyó ini ñayīví

4 ¿Te ndese quéjéé jéé cájejnáhan ró jiín jéé cátejnáhan ró? Quéjéé síquī jeē cándiyo neé ni rō, te yōhyo scánda ini anuá rō. ²Chi cándiyo ni rō, te tu cáneváha ró, te suu sáha jeē cájehni rō ndīyí. Cándiyo ni rō jeē névaha jnáhan ró, te tu níhín rō, te suu sáha jeē cátejnáhan ró te cájejnáhan ró. Te tu cánihñ rō jeē cuní rō, chi tu cájicān rō nuū Yaā Dios. ³Te núu cájicān rō, te tu cánihñ rō, chi tu cájicān váha ró, chi mání jeē cusīñ ni máá ró cúu jeē

cájicān rō nuū yā. ⁴Ñayuu castóo Yaā Dios cácuu ró. ¿A tu cájini rō jeē núu cutóó ni rō jeē iyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóó ni jeē iyó ñayīví, ndúu i ñayuu jítu uhū nuū Yaā Dios. ⁵Te tu cáhán saá-ni jnūhun yáha jéé yosó núu tútu ii: Máá Espíritu jeē ni jéhe Yaā Dios jeē ndeé ini yō, cúcuññí ni yā jeē súcuan casáha yó, chi maní yā jiín yó, achí. ⁶Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu ii: Yaā Dios jési yā nuū ñayuu casáha téyí máá, te váha ni yā chindéé ñáhán yá ñayuu casáha suchí máá, achí. ⁷Núu súcuan te cuandetū rō nuū Yaā Dios. Te cuiñí ñihñ ró jéé ma cuátáhú ró jéxeén, te cunu coto róhó jijnáhan ró. ⁸Maní gā coo ró jiín Yaā Dios, te víhyá gā steén yā jeē maní yā jiín ró. Róhó jéé casáha cuēchi, na sándoo ró máá ró, stóo ró cuēchi. Te róhó jéé cácuñi rō coo maní rō jiín Yaā Dios níni jéé cácuñi rō cutóó ni rō jeē iyó ini ñayīví, na sándoo ró ánuá rō jeē tuá coo ró súcuan. ⁹Na jnáhuhū ni rō, te cucuíhyá ni rō, te na ndáhyú rō siquī jeē iyó cuēchi ró. Te vēsú ni cajecū rō, te vijna na ndáhyú cohó ró. Te vēsú ni cacusiñ ni rō, te vijna na nducuíhyá ni rō. ¹⁰Na sásuchí ró máá ró nuū Yaā Dios, te sájéhnu ya rohó.

**Ma cóndihvī ni yō siquī
cuēchi jnáhan yó**

¹¹Hermano jijnáhan ró, ma cahán neé ró siquī jnáhan ró. Chi tēe jeē cahán neé siquī jnáhan, chí jeē ndihví ni siquī cuēchi jnáhan,

nájnūhun jeē siquí ley yā cahán neé de, chi tu squícu de ley jeē cundáhú ni yō jnáhan yó, te nájnūhun cáhán de jeē tu íyó ndáa ley yā. Te núu cáhán rō jeē tu íyó ndáa ley yā, núu súcuan te nasūu jée squícu ró, chi sa jeē cahán rō siquí. ¹²Iyó ñin-ni Yaā jeē ni jéhe ley, te máá-ni ya cúu jeē sándaā siquí cuéchi. Te jnama ya ñayuu cácanđíje te snáhnū ndetū yā ñayuu tu cácanđíje. Núu súcuan źte na jniñu ndiso ró jée sándaā rō siquí jnáhan ró?

Tú vāha jeē satéyí yó maá yó

¹³Vijna te cáhán rī jín rōhó jée cácahān: Vijna chí sājnē te quihīn yō ñuu yúcuan, te coyūcu yó ñin cuiyā, te cuaan yó xíco yó, te nihīn yō siquí, achí ró. ¹⁴Te tu jíní cuítī rō ndese coo sajnē. ¿Chi na vé va víhí cúu vida rō? Cúu nájnūhun ñin vicō nūhún jée ñin núnúu-ni núcūhun, te yūcuán na te ndéchi-ni cuahān. ¹⁵Chi sa vāha ga na cáhán rō: Núu cúní maá Jítoho yō te cotecu yō te sáha yó jée yáha chí jée yúcuan, achi rō. ¹⁶Te sa suhva máni cácutéyí ni rō cácahān rō. Te tú vāha jeē súcuan cácutéyí ni rō. ¹⁷Te núu ñin ñayuu jiní i sáha i jniñu vāha, te núu tu sáha i, te cuéchi cúu núu súcuan.

Jnūhun cáhán nuū tēe cúcá

5 Te cáhán rī jín táca rōhó tēe cúcá, jée na ndáhyú rō te ndahyū cohó ró siquí jnūndóho jeē quíji nuū rō. ²Chi ndajniñu cúcá cánevāha ró, je téhyú. Te sahma vāha ró, je tēe tiquíxin. ³Te oro jín plata cánevāha ró, chi je cáne xehyu. Te xehyu un stéén jeē ní

casáha ró jniñu stáhú jín xúhun ró. Te yūcuan cúu jeē ndúnihin cuéchi siquí rō, nájnūhun ñin ñuhūn jeē snáa yiquí cúñu rō. Chi ni cacaya cuehē rō ndajniñu vāha quiví cuándihí yáha. ⁴Te táca tēe ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhé andiví, jeē súcuan ni casáha ró. Te jíní sōho ya jeē cácana jee tēe ni cajehnde ún. ⁵Cátecu vāha ndasí ró ñin ñayiví yáha, te casáha ró táca jée cácusí ni maá ró. Te cájito yúcún ró maá ró, te cúu ró nájnūhun quítī neñu jeē ndétu quiví cúu. ⁶Te ni catee ró cuéchi siquí ñáyuu ndaā, te nde ni cajehni rō i. Te tu ní cúu casi i jeē casáha ró.

Jeē na cóo paciencia ni yō te cacān tahú yō

⁷Hermano, núu súcuan te coo paciencia ni rō condetu ró ndé quiví ndíji máá Jítoho yō. Tēe sājniñu ñuhun, cánuu coo paciencia ni de condetu de nde quiji saū néhen jín saū neñu isa, te sáa te nihīn de nuni vāha jeē jéhe itu. ⁸Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jítoho yō. ⁹Te ma cahán sōo ró siquí jeē sáha jnáhan ró, hermano, návāha ma jécondee cuéchi siquí rō. Chi máá Yaā jeē sándaā cuéchi, je yajni ndiji ya. ¹⁰Ñáni máni, conahan ró jijnáhan ró ndese ni casáha tēe ni canacani jnūhun máá Jítoho yō nde jenahán, chi ni cacuu de ñin ejemplo nuū yō. Chi vésú ni candoho de, te ni iyo paciencia ni de. ¹¹Te cáhán yō jeē

ñayuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhoyo vāha ga ni quendōo de ni sáha máá Jítóho yō ná ni yāha jnúndóho. Chi yóhoyo cúndáhú ni yā yohó, te vāha ndasí ni yā jíin yó.

¹²Ñánī mánī, jeē cánuú gá cúu jeē ma cahán cāha ró síhví Yaā Dios jíin jnúhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ñin ga jnúhun súcuan ma cahán teyí ró. Chi núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scāa gā rō cahān rō, návāha ma ndenehen Yaā Dios cuēchi siquī rō.

¹³Te núu íyó ñin ró jéē ndóho jnúndóho, te na cácan tahú rō. Te núu íyó ñin ró jéē cúsiñi ni, te na cáta ró yaa jeē chíñúhún ró yá. ¹⁴Te núu íyó ñin ró jéē cuhú, te na cána ró téé jéhnú cándito ñayuu cácandíje. Te na cácan tahú de jehē ñayuu cuhú. Te jíin síhví máá Jítóho yō na

chíhi de aceite i. ¹⁵Te núu cácandíje de jeē sáha Jítóho yō jeē cájicān tahú de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. ¹⁶Núu súcuan te nacani ndaā rō cuēchi ró núu jnáhan ró, te cacān tahú rō jehē jnáhan ró návāha nduvāha ró jíjnáhan ró. Chi núu ñin téē ndaā ndíhví ni de jícan tahú de, te yóhoyo vāha níhín jníñu, chi sáha ya jeē jícan de. ¹⁷Chi Elías, téē ni nacani jnúhun Yaā Dios jenahán, suni ñin téē jeē nájnūhun íyó máá yó ni cuu de. Te ni jícan tahú ndasí de jeē ma cúun saū, te tu ní cúun saū unī cuiyā íñū yoō. ¹⁸Yūcuán na te ni jícan tahú tucu de, te ni cuun saū, te ni canecoo tucu tāca jéē jéhe ñuhun.

¹⁹Ñánī mánī, núu ñin ró ni stóo ichi ndaā, te núu ñinga rō nachuhichí ró jnáhan ró, ²⁰núu súcuan te cuni rō jeē núu ni nachuhichí ró téē ni quiví cuēchi, te je ni jnama ró de jeē jnahnú ndetū de núu, te súcuan íyó jnúhun cáhnu ni nuū cuehē cuēchi de.